

# Denunzia encunter l'Uffizi da chatscha e pestga dal Grischun

■ (cc) La fin d'avust è vegnì inoltrà ina denunzia penala encunter Georg Brosi e ses substitut tar l'Uffizi da chatscha e pestga Hannes Jenny. Motiv per la denunzia: Negligentscha dad impediment da delicts sco era sustegn per la periclitaziun da corp e vita. L'uniun «Wildtierschutz Schweiz» fetschia reproschas encunter il schef da l'uffizi *Georg Brosi* e ses substitut *Hannes Jenny*, sco quai che la «Südosstschweiz» scriva. Tenor pagina d'infurmaziun wildbeimwild. com ha l'uniun fatg ina denunzia pervia dals suandants puncts.

– Negligentscha dad impediment da delicts encunter la lescha da chatscha

– Sustegn per la periclitaziun da corp e vita

– Sustegn per fraud intenziunà d'in chatschadur d'in animal protegì

– Sustegn da la contaminaziun cun munizium da plum d'in territori natural protegì e da muntada naziunala.

## Motiv per la denunzia

En il Grischun ha gi lieu enfin la fin favrer la chatscha da guetta. En la naiv laschan ils animals selvadis enavos fastizs ch'il chatschadur po suandar. Scumandadas èn uschenumnadas plazzas d'estga (Luderplätze) nua che la selvaschina vegn carmalada cun charn e pavel. Sin l'intschess Oberkunkels da la vischnanca Vättis haja dentant dà ina tala piazza d'estga. Quella n'haja l'Uffizi per chatscha e pestga, malgrà supplicas da pliras varts, betg eliminà, uschia la reproscha.

Plinavant sa chattia sin radund 60 meters da questa piazza d'estga ina stalla da nursas. Uschia na saja la piazza d'estga betg mo in privel per la selvaschina, ma bain era per ils abitants en vischinanza. Ils protecturs dals animals inculpeschan

in chatschader dad Igis d'avair endrizza questa piazza d'estga. Cun sia estga per la selvaschina carmalia el era lufs che stargarian lura las nursas.

## Tschintg plazzas d'estga

In'ulteriura piazza d'estga s'haja chattà en in territori natural protegì «da muntada naziunala». Là saja vegnì sajettà cun munizium da plum ed uschia vegnì contaminà in toc da pali. Malgrà l'intervenziun dal fittadin haja l'uffizi da chatscha e pestga ignorà questa polluziun da l'ambient. Plinavant haja il chatschadur sin l'intschess da Kunkels gi almain duas da questas plazzas d'estga e trais ulteriuras en il circol dad Igis. Tut betg lubì.

«Leschas vegnan cuntrafatgas pliras giadas ed il chatschadur n'è betg vegnì chastià da l'Uffizi per chatscha e pestga», atgisa l'uniun da protecziun dals animals «Wildtierschutz Schweiz». Per quest motiv hajan ins inoltrà la denunzia penala.